

Messadi pertuccond credit supplementar per la sanaziun dalla Via dalla Posta e dalla Via dalla Staziun a Glion

Stimau signur president

Stimadas parlamentarias, stimai parlamentararis

La surbaghegiada Marcau cundiziunescha era per la vischnaunca entginas lavurs vid l'atgna infra-structura en quei territori. Perquei che buc tuttas lavurs ein stadas enconuschentas exactamein igl onn vargau e perquei ch'igl ei previu memia paucs mieds finansials el preventiv 2018, basegna ei in credit supplementar. En connex culla terminaziun dalla surbaghegiada Marcau fa ei ussa prescha ed aschia ein las lavurs gia en realisaziun. Il parlament ei vegnius informaus ils 11 d'avrel 2018 en caussa.

Las lavurs cumpeglian principalmein suandonts treis projects:

A Lavurs da contuorn surbaghegiada Marcau

La renovaziun e creaziun dalla part dil passapei che schai sin terren public ei pensum dalla vischnaunca. Leutier auda la creaziun dalla surfatscha per zona da pedunzs cun emplontaziuns corrispundentas. Medemamein vegnan endrizzai in liug per rimnada da rumien cun container sutterran sco era en differents loghens parcadis da velos. Pervia dalla nova retscha da plontas alla Via dalla Posta han las lingias d'electricidad e da colligaziun internet stuiu vegnir spustadas gia avon el spazi dil passapei da l'autra vart dalla via. Il conduct per aua da plievgia (conduct collectiv per igl areal entuorn la casa da scola Glion) ha, cun consentiment dalla surbaghegiada Marcau saviu vegnir transferius el foss da construcziun dalla surbaghegiada cun obligaziun da surprendre ils cuosts.

B Sanaziun dalla Via dalla Staziun


Sper la rasada da fundament e drenascha insufficienta ei la Via dalla Staziun dapi in temps era alla surfatscha en in stan miserabel. La surfatscha ei maluliva, plein ruosnas e cun scarps ella cuvrida. Ils urs ein sestuschai e mauncan per part schizun. El rom dalla sanaziun vegn era spartiu l'aua da plievgia tenor ordinaziun dil plan general d'allontanament d'aua sco era sanau l'illuminaziun dalla via. Dil reminent ei la sanaziun dalla Via dalla Staziun cumpart d'in project parzial dalla renovaziun digl areal dalla staziun e dalla posta. Ultra da quei auda tier quella in sistem da direger il traffic dinamicamein per menar il traffic individual ella garascha sutterrana dalla surbaghegiada Marcau ni era tiels parcadis da cuorta durada alla staziun. Ils cuosts persunter ein cuntenti el credit obligont per la renovaziun digl areal dalla posta e dalla staziun. Votantas e votants prendan posiziun leutier ils 23 da settember 2018.

C Sanaziun Via dalla Posta

El decuors dil davos miez onn ei semussau ch'era la Via dalla Posta sto vegnir sanada. Per motivs da cuosts ei sulettamein la cuvrida vegnida renovada a caschun dalla davosa sanaziun il 2013. Aschia ei la rasada da fundament dalla via e la drenascha da datum pli vegl. Da principi era la via en oreifer stan avon las lavurs dalla surbaghegiada Marcau. Entras il squetsch dall'apparatura cun tradel da rotaziun duront il trer las preits encastradas ei vegniu caschunau per liung dalla via donns vid quella la primavera 2017. La metoda da baghegiar ch'ei vegnida applicada ha caschunau che la lingia d'aua da plievgia e la rasada da fundament ein sesbassadas. Igl atun 2017 ei vegniu fatg in'expertisa per eruir il donn. Quella ha mussau ch'il donn vid la via ei vegnius caschunau entras agir nunprecaut. Entras schurmetg nunsufficient dil sutterran ei la peisa vegnida sviada sin la via. La rasada da funda-

ment era buca dimensiunada per talas peisas ed ha dau sunter. Era vid la Via dalla Staziun ha ei dau donns da dimensiun pli pintga. Malgrad tut ei semussau che las perspectivas da survegnir restituziuns entras la segirada dalla Rhomberg AG, la construida dalla surbaghegiada Marcau, da dimensiun considerabla ein buca dadas. In process stentus cun cuosts supplementars per ulteriuras expertisas e representaza legala fussen consequenza da quei. Per quei ein la vischnaunca e la Rhomberg AG secu-nvegnidas sin in'indemnisaziun pauschala da 90'000 francs.

Dil temps dall'elaboraziun dil preventiv 2018 eran quellas informziuns aunc buca avon maun e per-quei ha quella intenziun era buca saviu vegnir planisada definitivamein. Igl ei denton indispensabel che la via sto vegnir sanada aunc avon la finiziun, rsp. avon l'avertura dalla surbaghegiada Marcau. Era cheu cumpeglia la sanaziun sper la renovaziun dalla via per propi era la separaziun dall'aua da plievgia sco era la renovaziun dall'illuminaziun dalla via.



Plan schematic dals singuls projects.

Preventiv 2018

Sin fundament da quei pugn da partenza ei vegniu priu en el preventiv 2018 suandonts cuosts bruts:

6150 5'010 34 Lavurs da contuorn surbaghegiada Marcau	CHF 715'000.00
6150 5'010 35 Sanaziun Via dalla Posta e Via dalla Staziun	CHF 150'000.00
Preventiv total 2018	CHF 865'000.00

Las lavurs dil contuorn dalla surbaghegiada Marcau vegnan realisadas actualmeins e schain el rom dil projekt concediu e dil preventiv 2018. La posta dil preventiv da 715'000 francs cuntegn sper las lavurs da contuorn per propi era la renovaziun dalla sdrema cunfinonta dalla via en ladezia dad 1 meter. Ella realisaziun ei quei meter cumpart dallas duas sanaziuns da vias.

La sanaziun dalla Via dalla Staziun ei vegnida schatzegiada oriundameins cun ina summa da 250'000 francs (senza la sdrema dad 1 meter). El preventiv definitiv 2018 ei lu vegniu priu si mo 150'000 francs. Per la submitziun dallas lavurs d'impessari e las lavurs da cuvrada la primavera 2018 ein ils schazetgs oriunds semussai per corrects Per la sanaziun dalla Via dalla Posta eran negins mieds previ.

Cuosts niev

Cuosts bruts

La cumposiziun da cuosts sebase sin las cefras dallas offertas inoltradas. La submitziun ha giu liug durant il fevrer/mars digl onn current.

Lavurs da contuorn surbaghegiada Marcau (senza sdrema d'1 meter)	CHF 576'483.65
Sanaziun dalla Via dalla Staziun (inclus sdrema d'1 meter)	CHF 325'000.00
Sanaziun dalla Via dalla Posta (inclus sdrema d'1 meter)	CHF 320'000.00
Realisaziun dalla procedura da perimeter Via dalla Posta e dalla Staziun	CHF 20'000.00
Cuosts totals	CHF 1'241'483.65

Facit: En cumparegliaziun cul preventiv ein cuosts bruts ell'altezia da 376'483.65 francs buca calculai.

Contribuziuns:

Contribuziun Rhomberg AG per donns vid la Vias dalla Posta/dalla Staziun	CHF 90'000.00
Contribuziuns da perimeter Via dalla Posta	CHF 64'000.00
Contribuziuns da perimeter Via dalla Staziun	CHF 97'500.00
Contribuziuns totalas	CHF 251'500.00

Surpli da cuosts:

Cuosts effectivs da construcziun	CHF 1'241'483.65
Summa previda el preventiv 2018	CHF 865'000.00
Surpli da cuosts brut	CHF 376'483.65
Contribuziuns ch'ei da spitgar	CHF 251'000.00
Surpli da cuosts net	CHF 126'483.65

Termins

Lavurs da contuorn surbaghegiada Marcau	matg tochen fin uost 2018
Sanaziun Via dalla Staziun	matg tochen entschatta zercladur 2018
Sanaziun Via dalla Posta	zercladur tochen miez fenadur 2018
Finizun dallas lavurs da construcziun	miez uost 2018
Inauguraziun Marcau	fin uost/enschatta settember 2018

Tenor art. 35 lit. j dalla constituziun da vischnaunca ein credits posteriurs da suttametter al parlament aschilunsch che quels survargan ina posiziun dil preventiv ni in credit obligont per dapli che 20 pertschien, minimalmein denton per dapli che 20'000 francs. Tier la fatschenta presenta ei quei il cass.

Proposta

Sin fundament dallas explicaziuns precedentas fa la suprastanza communal la damonda d'approbar quei credit supplementar al preventiv da 380'000 francs (brut) per la sanaziun dalla Via dalla Posta e la Via dalla Staziun.

Ilanz/Glion, ils 28 da matg 2018

Suprastanza communal Ilanz/Glion